

現代生活藝術系列

# 華嚴經疏論纂要 37

— 升夜摩天宮品、夜摩天宮偈讚品

華藏淨宗學會印贈

大方廣佛華嚴經疏論纂要卷第三十七

五臺山清涼國師澄觀疏鈔

太原方山長者李通玄 論

閩鼓山私淑比丘導霈纂要

升夜摩天宮品第十九

○自下第四中賢十行會。四門中。初來意

疏來意者。酬前十行問故。匪知之艱。行之惟艱。前解此行。若膏明相類。目足更資。故次來也。次品來者。此會四品。分三。初二品。當會由致。次一品。當會正宗。後一品。勝進趣後。於由致中。此品先明感應。

道交。後品明讚德顯體。前會已終。將陳後說。故次來也。

○二釋名

〔疏〕釋名者。會名有三。一約處。名夜摩天宮會。夜摩。此云時分。卽空居之首。表十行涉有化物。宜適其時。時而後言。聞者悅伏。時而後動。見者敬從。涉有依空。卽事入玄。託此而說。約人名功德林。約法名十行會。竝如後釋。三皆依主次品名者。大同於會。然梵本中。上無升字。下有神變。譯者以升爲神變。升爲神變。畧有四義。一不離前三而升。此故。二升

一處卽升一切處故。三升以廣其處故。四前後同時。無障礙故。謂佛以圓徧之身不起而升時分天宮。升屬如來。夜摩約處相違釋也。前升須彌。後升兜率。準此可知。

○三宗趣

〔疏〕宗趣者。會品之宗。竝如名說。意趣可知。

〔論〕何故名夜摩天宮。明以處表法。此天名爲時分天。爲此天無日月晦明。以蓮華開爲晝。合爲夜。故名時分。爲表十行法門。知時而應物。化不可不知時。知是人天種。二乘三乘一乘種。知可以何善根。

而接引之。故以時分天以表所行之行。須知時故。須彌山以表十住之法門。明以從信升進離凡夫地故。又表十住之位。初登法頂相盡處故。又表須彌處大海中。高八萬四千由旬。非手足所攀緣而升上故。明初十住之位。非以有心想求觀行攀緣所及。以無思不爲蕩然智應。萬法無依。方可升也。此十行位處夜摩之中。明依空而住。不與人連。十行亦然。依法空而行。知時而益俗也。故處此天而表之也。於兜率天說十迴向爲明其處。居欲界天之中。又明此天樂知足。以表十迴向。以迴正智。

處俗利生。處大悲門。饒益一切。於諸境界。無所貪求。故處此天。以爲所表。升他化天。說十地法門者。超過化樂。明至欲界際。表十地自在。超升化樂。至欲界之頂。化心魔王。至欲盡際。故升第三禪。說佛華法門。明普賢行滿。表以行法悅。悅無盡衆生。故又彰第四禪。是佛位。故此約進修升降。表法且如是安立。然其理智。一徧周。無去來也。以此皆云不離菩提道場。普光明殿。而升忉利。夜摩。兜率等。如第三禪。超初禪。二禪者。明位。倍勝。故此一會未有來文。是纓絡本業經。如來領聲聞菩薩衆向。

菩提樹下。說往昔於此菩提樹下。初成正覺時。說法界經。一一排次。至第三禪故。是故於此夜摩天以表十行。

○四釋文。一品長分爲十。第一本會圓徧。

爾時如來威神力故。十方一切世界。一四天下。南閻浮提。及須彌頂上。皆見如來處於衆會。彼諸菩薩。悉以佛神力故。而演說法。莫不自謂恒對於佛。

〔疏〕本會圓徧。謂前會不散。而說後會故。初句徧因。十方下徧相。亦有主伴等。竝如上說。但處加須彌。則而演說法。通上三會。

○第二不離而升

爾時世尊不離一切菩提樹下。及須彌山頂。而向於彼夜摩夫宮寶莊嚴殿。

○第三天王見佛

時夜摩天王遙見佛來。

〔疏〕竝如前會

○第四各嚴殿座

卽以神力。於其殿內。化作寶蓮華藏師子之座。百萬層級。以爲莊嚴。百萬金網。以爲交絡。百萬華帳。百萬鬘帳。百萬香帳。百萬寶帳。彌覆其上。華蓋鬘蓋香蓋。



寶蓋各亦百萬周迴布列。百萬光明而爲照曜。百萬  
夜摩天王恭敬頂禮。百萬梵王踊躍歡喜。百萬菩薩  
稱揚讚歎。百萬天樂各奏百萬種法音相續不斷。百  
萬種華雲。百萬種髮雲。百萬種莊嚴具雲。百萬種衣  
雲。周而彌覆。百萬種摩尼雲。光明照曜。從百萬種善  
根所生。百萬諸佛之所護持。百萬種福德之所增長。  
百萬種深心。百萬種誓願之所嚴淨。百萬種行之所  
生起。百萬種法之所建立。百萬種神通之所變現。恒  
出百萬種法音。顯示諸法。

疏初一句。總依空起行。故云化作。無著導行。故曰

蓮華。一行舍多。所以稱藏餘如上說百萬已下。別顯嚴相。於中四。初明座體備德嚴。皆云百萬位漸增。故次百萬夜摩下。明座旁圍繞嚴。三從百萬種善根下。法門行德嚴。文有八句。攝爲四對。一因緣。二福智。深心契理故。三願行。四體用。無生法體之所起故。四末後一句。法教流通嚴。

○第五請佛居殿

時彼天王敷置座已。向佛世尊。曲躬合掌。恭敬尊重。而白佛言。善來世尊。善來善逝。善來如來。應正等覺。唯願哀愍。處此宮殿。

○第六如來受請

時佛受請。卽升寶殿。一切十方。悉亦如是。

○第七各念昔因

爾時天王。卽自憶念過去佛所所種善根。承佛威力。而說頌言。

〔疏〕然晉經亦有樂音止息。今畧無者。譯人之意。謂不如十解會事。歸理不云樂音止息。不及廻向事。理無礙。不云熾然退。可同前進。可齊後。故並畧之。

○第八偈讚十佛

名稱如來聞十方

諸吉祥中最無上

彼曾入此摩尼殿

是故此處最吉祥

〔疏〕此十。是前會十佛之前。如次十佛。明位漸高。念昔亦遠。理實三世諸佛。皆同此說。餘如前會。文亦有二。先明此界。後辨結通。前中十偈。亦各有四。初句標名讚別德。次句通顯具吉祥。三憶曾入此殿。四結處成勝極。亦初一句諸頌不同。初二字別名。次二字通號。下三字別德。亦皆以下別德釋上別名。一以聞十方釋成名稱。

寶王如來世間燈

諸吉祥中最無上

彼曾入此清淨殿

是故此處最吉祥

〔疏〕二以世間燈釋寶王義。珠有夜光可代燈者。爲寶中王。佛有智光照無明夜。故曰寶王。

喜目如來見無礙

諸吉祥中最無上

彼曾入此莊嚴殿

是故此處最吉祥

然燈如來照世間

諸吉祥中最無上

彼曾入此殊勝殿

是故此處最吉祥

饒益如來利世間

諸吉祥中最無上

彼曾入此無垢殿

是故此處最吉祥

善覺如來無有師

諸吉祥中最無上

彼曾入此寶香殿

是故此處最吉祥

〔疏〕三。四。五。六。義竝可知。

勝天如來世中燈

諸吉祥中最無上

彼曾入此妙香殿

是故此處最吉祥

〔疏〕七。以世燈釋勝天者。身智光照。勝於天。故

無去如來論中雄

諸吉祥中最無上

彼曾入此普眼殿

是故此處最吉祥

〔疏〕八。以論雄釋無去者。具勇智辨。不可動。故

無勝如來具衆德

諸吉祥中最無上

彼曾入此善嚴殿

是故此處最吉祥

苦行如來利世間

諸吉祥中最無上

彼曾入此普嚴殿

是故此處最吉祥

〔疏〕九十可知。又此中殿各舉別名。初一嚴體。下皆寶之別德。謂此寶清淨。以用莊嚴殊勝。無垢。此寶發香。是香必妙。能嚴之寶。無所不見。可謂普眼。如是嚴者。是善莊嚴。無處不嚴。名普嚴也。又善嚴者。善因生故。

○第九佛同升殿

如此世界中夜摩天王。承佛神力。憶念往昔諸佛功德。稱揚讚歎。十方世界夜摩天王。悉亦如是。歎佛功德。爾時世尊入摩尼莊嚴殿。於寶蓮華藏師子座上。

結跏趺坐

○第十處忽寬容

此殿忽然廣博寬容。如其天衆諸所住處十方世界  
悉亦如是。

〔疏〕竝如前會。

〔論〕頌中歎十佛昔曾入此殿。明今所入十行理智  
與古無殊。此十如來還是約行升進所成之號。前  
十任位升須彌頂。十如來名號亦是隨位會古之  
號。明所入之法不異古今諸佛故。如十任位中須  
彌頂上帝釋宮中遙見佛來。卽於殿中安置普光



明藏師子之座。爲明初入如來智慧中生。卽以方便三昧之門。名安置。譬光明藏。卽明智智慧照耀法界藏故。今此十行位。時分天王。遙見佛來。化作寶蓮華藏師子之座者。明以行華設其教網。漉諸衆生。令入如來智之境界藏故。蓮華表行無著義。故化座者。明行體以依十住智慧。虛無法身。安立所作如化也。末後五行經都結十方。同時歎佛如來入殿其殿包容。如天所住者。明入位升進。自智寬容。方知佛境界故。

升夜摩天宮品竟

夜摩宮中偈讚品第二十

○四門中。初來意

〔疏〕來意者。助化讚揚故。說行體性。故行所依。故然三天偈讚來意宗趣。大旨是同。但解行願以爲異耳。

○二釋名。三宗趣

〔疏〕兩者亦不異前。約處約行。少有別耳。

〔論〕釋品名目者。明升夜摩天宮。以說十行之法。此品以功德林等十菩薩衆。各各以當位之行。以偈都讚當位之法。故名偈讚品。釋品來意者。明欲說

十行之法。先須偈。都讚十。行之中。因果法門。故此品須來。若不先舉所行之因果。十行有何依成。

○四釋文者。文亦有三。一集衆。二放光。三偈讚。今初。

爾時佛神力故

〔疏〕初中有十。一正明集因。亦卽各隨其類。爲現神通也。

十方各有一大菩薩

〔疏〕二辨主菩薩

一一各與佛刹微塵數菩薩俱

疏三明眷屬數

從十萬佛刹微塵數國土外諸世界中而來集會

疏四來處分量。然顯數隨位增。信十。在百。迴向是萬。此合當千。而云十萬。或譯人之誤。或是十百。則傳寫之誤。

其名曰功德林菩薩。慧林菩薩。勝林菩薩。無畏林菩薩。慙愧林菩薩。精進林菩薩。力林菩薩。行林菩薩。覺林菩薩。智林菩薩。

疏五列菩薩字。同名林者。表十行建立。故行類廣多。故聚集顯發。故深密無間。故扶疎庇映。故此十

菩薩表行之體也。可以意消息之。

此諸菩薩所從來國。所謂親慧世界。幢慧世界。寶慧世界。勝慧世界。燈慧世界。金剛慧世界。安樂慧世界。日慧世界。淨慧世界。梵慧世界。

〔疏〕六來處利名。同名慧者。十解之慧。行所依故。

此諸菩薩各於佛所淨修梵行。所謂常住眼佛。無勝眼佛。無住眼佛。不動眼佛。天眼佛。解脫眼佛。審諦眼佛。明相眼佛。最上眼佛。紺青眼佛。

〔疏〕七明所事諸佛。同名眼者。以智導行。了了分明。成有目之足故。斯卽十行當位之果佛。於此位顯。

者皆名眼故。宜以當界之佛。與當界菩薩。共相屬對。思而釋之。鈔宜以當界等者。以佛是當位之果。菩薩即當位之因。如功德林菩薩下釋云。積行在躬。功德圓滿。故得成於常住之果。二慧為最勝。故成無勝眼。三悟勝義諦。名為勝林。故成無住眼。佛四聞深無畏。故成不動。五崇真拒迷。成大光淨。六事理無差。離身心相。故得解脫。七了相不動。得審諦眼。八照理正修。故成明相。九照心本源。果成最上。十鑒達諸佛。迥超聲色。心言路絕。故名智林。故得果妙明。為紺青眼。以菩薩各下文自釋。故令屬對。則果號可知。

是諸菩薩至佛所已頂禮佛足

〔疏〕八至已設敬。

隨所來方。各化作摩尼藏師子之座。於其座上結跏趺坐。

〔疏〕九參而不雜。

如此世界中夜摩天上菩薩來集。一切世界悉亦如是。其諸菩薩世界。如來所有名號。悉等無別。

〔疏〕十結通無盡。

○第二放光足上

爾時世尊從兩足上放百千億妙色光明。普照十方一切世界。夜摩宮中。佛及大衆靡不皆現。

〔疏〕謂趺背行必動。故背依輪指得有用。故表行依信解而成用。故餘同前會。

○第三偈讚。先明說偈儀。十菩薩說。卽爲十段。亦

以東方爲始。上方爲終。各有說偈所依。謂承佛力等。今初功德林菩薩。

爾時功德林菩薩承佛威力。普觀十方而說頌言。

〔疏〕功德林者。且就能說積行在躬。功德圓滿。故名功德。若就所歎。歎佛勝德。故云功德林。有十二頌。以是會主。總敘此會普徧之事。

○後正說偈讚

佛放大光明 普照於十方 悉見天人尊

通達無障礙

〔疏〕於中二。初八述讚奇特。後四舉德釋成。前中四



初一偈。敘此品放光

佛坐夜摩宮 普徧十方界 此事甚竒特

世間所希有 須夜摩天王 偈讚十如來

如此會所見 一切處咸爾

〔疏〕次二敘前品感應

彼諸菩薩衆 皆同我等名 十方一切處

演說無上法 所從諸世界 名號亦無別

各於其佛所 淨修於楚行 彼諸如來等

名號悉亦同 國土皆豐樂 神力悉自在

〔疏〕次三敘此品衆集

十方一切處 皆謂佛在此 或見在人間  
或見住天宮 如來普安住 一切諸國土  
我等今見佛 處此天宮殿

〔疏〕後二明目在瞽周

昔發菩提願 普及十方界 是故佛威力  
充徧難思議 遠離世所貪 具足無邊德  
故獲神通力 衆生靡不見

〔疏〕後四舉德釋成中二。前二舉因顯用

遊行十方界 如空無所礙 一身無量身  
其相不可得 佛功德無邊 云何可測知

無往亦無去 普入於法界

〔疏〕後二辨果用深廣於中一體用自在。上半不去徧至。下半卷舒相盡。謂一身卽多。則一相不可得。多卽是一。則多相不可得。是故恒一恒多。恒非一多。由此自在。一塵內身無不周于十方。徧十方身竝潛一身之內。皆悉圓徧。非分徧。故難思議也。後一深廣相成。上半牒廣辨深。下半釋深顯廣。謂不住故無處不至。不去故不離本位。此釋深也。塵毛等處無不普入。廣無邊也。

○第一二慧林菩薩

爾時慧林菩薩承佛威力普觀十方而說頌言

〔疏〕上明功德。此辨智慧。悟此除冥難遇之慧。故名慧林。偈中歎此

世間大導師 離垢無上尊 不可思議劫  
難可得值遇

〔疏〕十頌分三。初一明佛難遇

佛放大光明 世間靡不見 爲衆廣開演  
饒益諸羣生 如來出世間 爲世除凝冥  
如是世間燈 希有難可見

〔疏〕次六別釋難遇。於中亦三。初二益廣難遇

已修施戒忍 精進及禪定 般若波羅蜜  
以此照世間

〔疏〕次一因圓難遇。

如來無與等 求比不可得 不了法真實

無有能得見 佛身及神通 自在難思議

無去亦無來 說法度衆生 若有得見聞

清淨天人師 永出諸惡趣 捨離一切苦

〔疏〕後三果深難遇。

無量無數劫 修習菩提行 不能知此義

不可得成佛 不可思議劫 供養無量佛

若能知此義 功德超於彼 無量剎珍寶  
滿中施於佛 不能知此義 終不成菩提  
〔疏〕三有三偈。按量顯勝。於中初一長時大行按量。  
次一長時供佛按量。後一勝物供佛按量。

○第三勝林菩薩

爾時勝林菩薩。承佛威力。普觀十方而說頌言

〔疏〕勝林。悟勝義甚深之法故。

譬如孟夏月 空淨無雲暄 赫日揚光暉  
十方靡不充 其光無限量 無有能測知  
有目斯尚然 何況盲冥者 諸佛亦如是

功德無邊際 不可思議劫 莫能分別知

〔疏〕偈歎深廣無涯之德。十頌分二。初三明佛德廣博。後七顯法體甚深。橫豎互顯。前中初二喻況。後一法合。喻言孟夏月者。取意譯也。梵本敵對。翻云後熱月。西域如來聖教。一歲立爲三際。謂熱。雨。寒。西域記云。從正月十六日。至五月十五日爲熱時。則後熱月言。兼得此方孟夏後半。餘之一二際。各有四月。準釋可知。赫日之言。但取陽光時長。難窮其際耳。彼方或爲四時。與此名同。但以正月黑半爲首耳。

○後七中。令於依他修三無性。觀以餘之二性不離依他故。由於二性成依他故。謂圓成是依他體性。徧計但橫執依他。又迷真似現故。卽依三性說三無性。三性尙一。豈有三無。三無但是卽有之無。三性但是卽無之有。有無不二。爲一實性。有無形奪。性亦非性。故於依他中。具修諸觀。鈔謂圓成卽是依他之體。故觀依他必觀其體。離依他性無可橫執。故徧計性亦約依他。又迷真似現者。此之一句。具足三性。迷卽徧計。真卽圓成。似卽依他。前意明二不離依他。此義明二能成依他。故但觀依他。已具三性。卽依三性下。二明三無性不離三性。全是唯識得文具足。應云。卽依此三性立彼三無性。初則相無性。次無自然性。後由遠離前所執我法性。則三無性依。



三性有。三性尚一下。三明融通謂三性是有。尚猶是一。三無無相。豈定有三。故收三性。但是一。有三無。但是一無。離有無無。故有無不二。初句約顯。後有無形奪下。約遮餘義。玄中已具其相。

諸法無來處 亦無能作者 無有所從生

不可得分別 一切法無來 是故無有生

以生無有故 滅亦不可得 一切法無生

亦復無有滅 若能如是解 斯人見如來

疏文卽分三初三作生無自性性觀。次二兼修勝

義無自性性觀。後二修相無自性性觀。鈔初三作

性觀者。卽第二依他上無性也。卽唯識云。次無自

然性。然三無性名。須彌偈品文中已有。今復畧釋。謂法從緣無自性。故上生自性。卽是所無下。一性字。是無自性。謂無自然生之自性。爲其性故。

勝義無自性性者。卽第二無性勝義自性。卽是所無。下一性字。義同於前。顯無彼勝義之性爲其性。故勝義卽是圓成。圓成卽是真如。故唯識云。此諸法勝義亦卽是真如。常如其性故。卽唯識實性。相無自性性者。卽第一無性。謂徧計之相亦不可得。如繩上蛇。下一性字。是第一性。以相無自性而爲其性。今初卽分爲三。初偈正觀無生。初句果空。謂緣生果法。非先有體。從世性微塵及未來藏。因緣心識中來。若有來處。卽先已有。如鳥來棲樹。何得言生。次句因空。旣無有果。對何說因。又世性等。亦是妄計。因緣有故。次句雙遣。所從是因。所生是果。又初句不自生。次句不他生。次句不共生。又初句非先有而生。次句非先無而生。次句非半有半無。

三義各以末句息妄成觀。初句果空等者。卽中論  
名奪破於中先奪破其所計。先有先無門觀也。然亦  
微塵卽是外道及未來藏。卽一切有部。因緣通大  
小乘。約相識卽唯識。唯心所現。若執定有皆爲  
所遣。若有來處下。縱破鳥來樓樹。卽中論青目釋  
無來文。謂先有鳥而來就樹。可名爲來。今從無之  
有曰生。曾何先有。次句因空者。卽經亦無能作者。  
能作是因。因卽我也。亦卽牒辭。從旣無有果下。破  
也。卽相待門破。可知。又世性等。亦是妄計。因緣有  
故者。亦因緣門。因緣無性故。亦無體門。但有妄計  
無實體故。又初句不自生等者。上之四句。各別門  
破。今通用因緣門。以四開破。畧無無因。中觀論云  
諸法不自生。亦不從他生。不共不無因。是故知無  
生而雜集論二門釋之。一云不自生者。謂一切法  
非自所作。彼未生時。無自性故。不從他生者。謂彼  
法緣非作者故。不從共生者。謂卽由此二種。因故  
非不自作他作故。不無因生者。謂緣望衆生。有功  
能故。一又因緣互奪釋云。自種有故。不從他等。次  
後當釋。又初句非先有下。前來唯初句用先有門。

今通三句。皆用先有先無門。中論因緣品云。果先於緣中。有無俱不可。先無為誰緣。先有何用緣。影公云。因中先有。則境界在六根。因中先無。則因同非因。因同非因。則可鑽冰出火。境界在六根。則可湯中求冰。若亦有亦無。則具上二過。其第四句。乃非此門。故中論云。若果非有生。亦復非無生。亦非有無生。何得言有緣。次偈以無生釋無滅。畧有三義。一無生可滅。故二無待對。故三例生從緣。故後偈觀成。利益經云。無生卽是佛。故論云。若見因緣法。則為能見佛。依他因緣。卽無生故。經云等者。正是大品法。尚答常啼云。諸法如。卽是佛。諸法無生。卽是佛等。下句既云。斯人見如來。卽無生。是佛義耳。須彌得讚品。一切慧菩薩云。一切法無生。一切法無滅。若能如是解。諸佛常現前。故論云等者。卽中論四諦品末云。是故經中說。若見因緣法。則為能見佛。

諸法無生故 自性無所有 如是分別知  
此人達深義 以法無性故 無有能了知  
如是解於法 究竟無所解

**疏**次二偈約依他兼修勝義無自性性觀中前偈遣所觀上半辨觀下半明益各合二義故致兼言一者成前謂非唯能相之生生即無生所生法體從緣無性即無所有此顯依他無性是圓成性益云深者即事而真故二云無生真性亦無所有即彼勝義無自性性益云深者真性不立故鈔各舍二義者

釋上兼修之言而云各者正取上半觀相下半觀益爲各二義即依他圓成如下疏列而下遣能亦

舍依圓故此各言。兼於能所。方順二偈兼修之言。一者成前下。別示二義之相。此卽依他中義也。先明觀相。由前得遣能相。四相畧舉生滅。已含在異。此偈遣所相。色心法體。由四相相成。其有爲當法緣生故。無自性觀益可知。二云。後偈遣能觀。然有無生下。卽兼修勝義無性義也。

二義。一成前所觀。謂以無性故。無有能了。如無有人。能了龜毛長短大小。知無所了。是究竟了。二是

正遣能了。旣無所了。亦無能了。能所兩亡。爲究竟

解。後偈遣能觀者。然此疏中二義。亦通前依圓前。義依他圓成。俱無所了。後義依圓。皆無能了。皆

由卽性。卽無性故。故疏結云。能所雙亡。卽正結上二義也。亦通結上二偈能所。

所說有生者。以現諸國土。能知國土性。

其心不迷惑。世間國土性。觀察悉如實。

若能於此知 善說一切義

疏後二偈明相無自性性觀中。初偈正明。後偈總結。前中上半顯執不了國等依他。謂為現見。妄計為生。故晉經云。所言有生者。當知由所生。下半明觀。若知無性。則離徧計。故後偈總結。稱於事理之實。以觀世等。故善說也。鈔不了國等者。而言等者。結云。世間國土性。世間之言。通有情世間。故致等言。言謂為現見者。以中論內小乘被破。皆悉救云。世間現見故意云。不合與世間相違。又佛言。世智說有。我亦說有。世智說無。我亦說無。今現見有國等。諸法豈得言無。故引晉經云。當知由所生。所生即現。故見國等。

○第四無畏林菩薩

爾時無畏林菩薩承佛威力。普觀十方而說頌言

〔疏〕以信樂力聞深不畏名無畏林。偈歎信向益深德故

如來廣大身 究竟於法界 不離於此座  
而徧一切處

〔疏〕十頌分二。初一所信之境。謂法身體卽法界。智身證極法界。致令應用之身不動而徧

若聞如是法 恭敬信樂者 永離三惡道  
一切諸苦難

〔疏〕後九聞信之益分五。初一聞信離惡



設往諸世界 無量不可數 專心欲聽聞  
如來自在力 如是諸佛法 是無上菩提  
假使欲暫聞 無有能得者

〔疏〕次二辨其難聞。

若有於過去 信如是佛法 已成兩足尊  
而作世間燈 若有當得聞 如來自在力  
聞已能生信 彼亦當成佛 若有於現在  
能信此佛法 亦當成正覺 說法無所畏  
〔疏〕次三明聞信成佛。將過去已成證現未當成  
無量無數劫 此法甚難值 若有得聞者

當知本願力

〔疏〕四有一偈。明聞必有由。勵物起願。

若有能受持。如是諸佛法。持已廣宣說。

此人當成佛。況復勤精進。堅固心不捨。

當知如是人。決定成菩提。

〔疏〕五有二頌。顯起行益。

○第五慙愧林菩薩

爾時慙愧林菩薩。承佛威力。普觀十方。而說頌言。

〔疏〕拒妄崇真。拒迷崇智。名爲慙愧。故偈讚如來大。

智勝益。

若人得聞是 希有自在法 能生歡喜心  
疾除疑惑網

〔疏〕十頌分三。初三法說難思。次六以喻並決。後一結德歸佛。今初。初偈明聞生勝益。令物希聞。自在法者。卽佛智也。

一切知見人 自說如是言 如來無不知  
是故難思議

〔疏〕次偈佛窮種智。故下位難思。

無有從無智 而生於智慧 世間常暗冥  
是故無能生

〔疏〕後偈顯智從生。此文反顯。然有二意。一者成前。謂欲生智慧。當於佛求。佛無不知故。不應求之於凡。凡暗冥故。猶攀芙蓉。必於深水。而於木末。安可得耶。二者成後。智從熏習自種而生。不從煩惱無智所生。是故下言。一心不同時。屬自愚智故。故應慎所習也。〔鈔〕二者成後有二。先正釋。謂由本有無漏種子。與多聞熏習和合。而生無漏智。故依唯識論。本有新熏。三師異說。第一清目等師。唯立本有。故論云。有義。一切種子。皆悉性有。不從熏生。由熏習力。但可增長。第二難陀。唯立新熏。故論云。有義。種子皆熏。故生。所熏能熏。俱無始有。故諸種子。無始成就。第三護法正義。論云。有義。種子各有二類。一者本有。二者始起。乃至云。由此應信。凡諸有情。無始時來。有無漏種。不由熏習。法爾成就。又云。其聞熏習。非唯有漏。聞正法時。亦熏本有。

無漏種子。令漸增盛。若爾。何以經言煩惱泥中。有展轉乃至生出世心。佛法耶。此說在纏如來藏故。然此大智。從藏德生。非從迷起。若爾。煩惱卽菩提。復云何通。約體性故。從所迷故。如波與濕。然實義者。真妄愚智。若約相成。一門峙立。若約相奪。一相寂然。雙照二門。非卽非離。若說一者。離之令異。如此章中。若云異者。合之令同。如後章是。善須得意。勿滯於言。然實義者。第二會

實義通會兩章。方顯中道。正通煩惱卽菩提難。是顯真妄交徹之義。雖說三門。義含四句。謂初二門峙立。依理成事。則唯妄非真。事能顯理。則唯真非妄。故各峙立。若說一者。下明此二章。正爲破病。若據菩薩。二皆會中。又此章。則二門峙立。後章。則二相寂然。故合此二。非卽非離。言若說一者。則離之。

令異者。謂有問言萬法卽真。一。如無異。故妄卽真。有。何過耶。答。畧有三過。一。能依卽是所依。謂依真有妄。如依水有波。今妄卽是真。使無能依以無能依。亦失所依。二。則亦失真。妄以妄卽真。故無妄。無妄對何說真。三者亦失真。假二門。若別則三義俱成。如金與嚴具。波之與水。動濕體相。一俱不同。能依所依。各有三義。皆不雜亂。若云異者。合之令同者。下章云。如金與金色。其性無差別等。若準

晉經云。非從智慧生。亦非無智生了。達一切法滅。除世間暗。則顯智體。絕於愚智。不稱實了。則名無

智。此偈雙明性相。後喻但顯二相不同。

如色及非色 此二不爲一 智無智亦然

其體各殊異 如相與無相 生死及涅槃

分別各不同 智無智如是 世界始成立

無有敗壞相 智無智亦然 二相非一時  
如菩薩初心 不與後心俱 智無智亦然  
二心不同時 譬如諸識身 各各無和合  
智無智如是 究竟無和合

〔疏〕二以喻並決中二。先五明二性相違。後一辨功  
能不等。今初。唯第二偈。三句是喻。餘偈。喻合各有  
半偈。一約色非色者。非色謂心。緣慮質礙。體性不  
同故。二中有二喻。相無相者。理事相反。生處涅槃  
真妄相反。雖同一體。分別義門。不相是故。三成之  
與壞。約相別故。四初心後心。時不同故。五諸識身。

所用別故。緣會不同故。眼無耳用。又此眼識不合  
餘根。識身同識。尚不相合。愚智性異。安得相生  
如阿伽陀藥。能滅一切毒。有智亦如是  
能滅於無智

〔疏〕二功能不等者。非唯二性各別。然智能滅愚。愚  
不滅智。藥能去毒。毒不去藥。亦猶明能滅暗。暗不  
滅明

如來無有上。亦無與等者。一切無能比  
是故難值遇

〔疏〕三一偈。結歸如來。迥出世表。故難值遇



○第六精進林菩薩

爾時精進林菩薩承佛威力普觀十方而說頌言

〔疏〕勤觀理事同無差別。離身心相。故名精進。十頌總相顯佛此德。前卽無差之差。此乃差之無差。二章相接顯非卽離。亦互相成。

諸法無差別 無有能知者 唯佛與佛知

智慧究竟故

〔疏〕十頌分二。初一約法雙標。後九就喻雙釋。今初也。初句標其所知。五類之法皆無有差。次句揀非餘境。下半唯佛究盡。

如金與金色 其性無差別 法非法亦然

體性無有異

**疏**後九釋中。前五釋所知。後四釋能知。前中初四正釋。後一遣疑。前中皆上半喻。下半法。無差所由。在於末句。一體色無別喻。此喻為總。喻雖是一。法合有二。該橫豎故。鈔此喻為總者。法非法。豎約理事交徹。法者事也。非法理也。色即空故。亦可法。真法也。非法妄法也。取文雖異。義旨乃同。謂如金之黃色。與金體斤兩。性無差別。隨取互收。合中金是所依。喻其真法。色是能依。喻妄非法。以妄無體攬。

真而起。則真無不隱。唯妄現也。以真體實。妄無不盡。唯真現也。是則無體之妄。不異體實之真。故云無有異也。亦同密嚴。如金與指環。展轉無差別。橫者。異法相望。法者。可軌之法也。非法者。不可軌之法也。又法謂有法。非法謂無故。中論釋法不生非法云。有不生無故。體性無異者。謂同如故。橫者異法相望者。卽一切差別法。無差別也。法卽是善法。非法卽惡法。故百論取般若若意云。福尚捨。何況罪。以金剛云。法尚應捨。何況非法。故以非法而名爲罪。又法謂有法者。亦是橫論。有無相對。故中論下。引論證成。無法爲非法也。然前義正順於喻。後義乃順標中諸法之言。要由初義性相無差。方得顯於後義。事事無

差若但用後義。未顯相全同性。那得顯於事事同於一性。

衆生非衆生 二俱無眞實 如是諸法性  
實義俱非有

〔疏〕第二偈。假名不實喻。以眞奪俗。是故無差。攬緣成衆生。卽虛非衆生。所遣旣無。能遣安有。故俱無實。以喻諸法皆無實義。竝從緣故。

譬如未來世 無有過去相 諸法亦如是  
無有一切相

〔疏〕三三世互無喻。喻無相故無別。謂若未來有過

去者。應名過去。何名未來。故知定無過現之相。文  
舉一隅。應反餘二。諸法無相。如彼互無。此以差別  
喻無差別。鈔文舉一隅。應反餘二者。應明現在無過未。過去無現未等。

譬如生滅相 種種皆非實 諸法亦復然

自性無所有

〔疏〕四四相非實喻。喻無性故無差別。生等四相離  
所相法。無別自性。一切諸法離所依理。無別自性。  
此以相無喻於性無

涅槃不可取 說時有二種 諸法亦復然  
分別有殊異

〔疏〕後遣疑者。疑云。若都無別。云何見有性。相等殊。故此釋云。亦如涅槃體離有無百非斯絕。而強立名字。曰餘無餘。諸法亦然。眞俗竝虛。分別成異。若離分別。則無一切境界之相。〔鈔〕眞俗竝虛等者。故像之所歸。絕稱之幽宅也。豈可以有無標榜。故有餘無餘。乃出處之異號。應物之假名耳。若離分別者。卽起信論。一切境界。唯依妄念而有差別。次云。若離心念。則無一切境界之相。

如依所數物 而有於能數 彼性無所有

如是了知法

〔疏〕第二四偈喻能知者。皆展轉遣疑。初偈疑云。既有分別。則有能知。故釋云。離所數物。無能數數。既

所知無性。何有能知。無知之知。是真了法。

譬如筭數法。增一至無量。數法無體性。

智慧故差別。

〔疏〕次復疑云。若依向喻。能數喻能知。能知雖無所知。猶有。故復用能數法。以喻所知。智慧差別。以喻能知。反覆相遣。顯無差理。謂一上加一。名之爲二。乃至百千。皆是諸一。由能數智。作百千解。故晉譯中第三句云。皆悉是本數。今譯明一多相待。故無體性。喻彼妄想。於無性中。計爲有無耳。亦妙反覆相遣者。謂以所知遣能知。復以能知遣所知耳。

譬如諸世間 劫燒有終盡 虛空無損敗

佛智亦如是

**疏**次又疑云。都無能所。何名佛智。故釋云。能所雙亡。佛智斯顯。故所知妄法。如世成壞。能知真智。湛若虛空。尚不初成。況當有敗。如出現品。又權智照俗。同世成壞。權卽是實。如不離空。鈔況當有敗者。經云。譬如世界有成壞。而其虛空不增減。一切諸佛成菩提。成與不成。無差別。是也。

如十方衆生 各取虛空相 諸佛亦如是

世間妄分別

**疏**末偈疑云。佛智既等。應用何殊。釋云。隨心妄取



佛無異相。又謂常無常。如各取空。佛智雙非。如空  
無別

建安集瑞坊弟子裴興靖林太才范興  
和南山傳暹同刻  
華嚴經夜摩天宮品疏論纂要第三十  
七卷流通伏願深植金剛之堅種長資  
人天之淨福常遇正法罪證菩提  
康熙二十二年九月 日華藏室謹題

大方廣佛華嚴經疏論纂要卷第三十七